



Sambutan
Hari Raya **MENURUT**
SYARIAT





PENDAHULUAN

Hari Raya Aidilfitri adalah hari kemenangan bagi umat Islam melawan hawa nafsu dan menyucikan hati dan diri. Perlu diingatkan bahawa sambutan Aidilfitri itu mesti dilakukan dalam kerangka syariat Islam. Umat Islam perlu mengikut lunas-lunas akhlak dan syariat Islam. Rasa kehambaan dan ketakwaan yang dibina di bulan Ramadhan itu jangan dicemari dengan perbuatan dan amalan-amalan yang boleh merosakkan kembali ketakwaan kita kepada Allah SWT.

Oleh itu, umat Islam haruslah menyambut Aidilfitri mengikut syariat Islam bagi memastikan hikmah yang baik dapat diterapkan dalam diri hamba itu sendiri. Selain daripada bergembira dan bersuka ria di hari yang mulia ini, umat Islam juga dituntut untuk melaksanakan ibadah seperti Solat Sunat Hari Raya Aidilfitri, saling kunjung mengunjung untuk mengeratkan hubungan kekeluargaan dan rakan taulan, menziarahi tanah perkuburan ibu bapa atau ahli keluarga yang telah meninggal dunia dan sebagainya.

Perlu diketahui daripada maksud di atas, hari raya Aidilfitri sebenarnya adalah kembali kepada fitrah, bersih daripada dosa dan noda yang telah dilakukan sebelum ini. Ini adalah kerana bulan puasa adalah bulan yang Allah ampunkan dosa-dosa hamba-Nya dan melipat gandakan ganjaran pahala bagi mereka yang melakukan amal soleh dan kebajikan. Maka janganlah dicemari hari ini dengan perbuatan-perbuatan yang menyebabkan titik-titik hitam kembali bertaut dalam hati kita.

SOLAT HARI RAYA AIDILFITRI

Solat Hari Raya Aidilfitri telah disyariatkan pada tahun Hijrah yang kedua. Solat hari raya pertama yang dilakukan oleh Rasulullah SAW ialah solat Hari Raya Aidilfitri pada tahun yang kedua Hijrah tersebut.

Hal ini berdasarkan hadith, daripada Abu Sa'id al-Khudri RA katanya :

كَانَ رَسُولُ اللَّهِ (صَلَّى اللَّهُ عَلَيْهِ وَسَلَّمَ) يَخْرُجُ يَوْمَ الْعِطْرٍ وَالْأَضْحَى إِلَى الْمُصَلَّى، فَأَوْلَ شَيْءٍ يَبْدَا بِهِ الصَّلَاةُ ثُمَّ يَنْصَرِفُ، فَيَقُولُ مُقَابِلَ النَّاسِ، وَالنَّاسُ جُلُوسٌ عَلَى صُوفِهِمْ، فَيَعِظُهُمْ وَيُؤْصِيهِمْ وَيَأْمُرُهُمْ، فَإِنْ كَانَ يُرِيدُ أَنْ يَقْطَعَ بَعْدًا قَطْعَةً، أَوْ يَأْمُرَ بِشَيْءٍ أَمْرَ بِهِ، ثُمَّ يَنْصَرِفُ.

Maksudnya: "Rasulullah SAW pergi ke musolla pada hari Aidilfitri dan Aidiladha. Perkara pertama yang Baginda lakukan ialah solat. Kemudian Baginda berpaling menghadap orang ramai yang masih duduk di dalam saf mereka, lalu Baginda memberikan nasihat dan menyampaikan apa-apa arahan kepada mereka. Jika hendak menghantar pasukan pejuang atau menyampaikan apa-apa arahan, Baginda membuat keputusan dan mengarahkannya pada masa itu. Selepas itu Baginda pun bersurai".

(Riwayat al-Bukhari (913) dan Muslim (889)

HUKUM SOLAT HARI RAYA AIDILFITRI

Hukum Solat Hari Raya adalah sunat *muakkad*. Ini kerana Rasulullah SAW tidak pernah meninggalkannya sejak mula disyariatkan sehingga kala Baginda wafat. Begitu juga para sahabat Baginda terus melakukannya selepas itu. Berdasarkan hadith daripada Abu Sa'id al-Khudri yang terdahulu, solat hari raya disyariatkan secara berjemaah namun sah dilakukan secara bersendirian.

Begitu juga ia disyariatkan berjemaah kepada semua *mukallaf* sama ada lelaki, perempuan, bermukim, musafir, merdeka atau hamba kecuali perempuan yang berhias atau yang memungkinkan fitnah, mereka hendaklah bersolat di rumah sahaja.

WAKTU SOLAT HARI RAYA AIDILFITRI

Waktu solat hari raya Aidilfitri bermula dari terbit matahari hingga tergelincir. Hal ini berdasarkan hadith daripada al-Barra' RA katanya, aku mendengar Rasulullah SAW bersabda:

إِنَّ أَوَّلَ مَا تَبَدَّأُ فِي يَوْمِنَا هَذَا أَنْ نُصَلِّي

Maksudnya: "Perkara yang pertama kita mulakan hari ini ialah bersolat".

(Riwayat al-Bukhari (908)

Maksud *hari* dalam hadith di atas adalah apabila fajar terbit. Pada waktu itu dilakukan solat Subuh sebelum matahari terbit, dan solat Zuhur selepas matahari tergelincir. Namun, waktu solat hari raya Aidilfitri yang afdhal adalah ketika matahari naik dengan kadar tinggi segalah. Ini kerana Nabi SAW sentiasa melakukannya pada waktu tersebut. Pada kebiasaan, solat hari raya Aidilfitri di negeri Kedah Darul Aman dilaksanakan pada jam 8.45 atau 9.00 pagi.

KAIFIAT / CARA SOLAT HARI RAYA AIDILFITRI

❖ *Lafaz niat :*

(أَصَلَّى سُنَّةً لِعَيْدِ الْفِطْرِ رَكْعَتَيْنِ أَدَاءً إِمَامًا / مَأْمُومًا لِلَّهِ تَعَالَى)

Maksudnya: "Sahaja Aku Sembahyang Sunat Hari Raya Aidilfitri dua rakaat tunai (iman/maknum) kerana Allah Ta'ala".

Rakaat Pertama

- ❖ Takbiratul Ihram
- ❖ Doa Iftitah
- ❖ Rakaat pertama. Bertakbir sebanyak tujuh kali. Disertakan dengan lafaz tasbih :

(سُبْحَانَ اللَّهِ وَالْحَمْدُ لَلَّهِ وَلَا إِلَهَ إِلَّا اللَّهُ وَاللَّهُ أَكْبَرُ)

- ❖ Membaca surah al-Fatiyah.
- ❖ Membaca satu surah atau beberapa ayat daripada al-Quran.
- ❖ Meneruskan solat sehingga selesai rakaat pertama

Rakaat Kedua

- ❖ Dimulai dengan lafaz takbir *intiqalat* (takbir permulaan rakaat kedua)
- ❖ Bertakbir sebanyak lima kali. Disertakan dengan lafaz tasbih :

(سُبْحَانَ اللَّهِ وَالْحَمْدُ لَلَّهِ وَلَا إِلَهَ إِلَّا اللَّهُ وَاللَّهُ أَكْبَرُ)

- ❖ Membaca surah al-Fatiyah.
- ❖ Membaca satu surah atau beberapa ayat daripada al-Quran.
- ❖ Meneruskan solat sehingga selesai rakaat pertama.
- ❖ Memberi salam.

Hadith seterusnya, Amru bin `Auf al-Muzani RA meriwayatkan:

أَنَّ النَّبِيَّ (صَلَّى اللَّهُ عَلَيْهِ وَسَلَّمَ) كَبَرَ فِي الْعِيدَيْنِ فِي الْأُولَى سَبْعًا قَبْلَ الْقِرَاءَةِ
وَفِي الْآخِرَةِ خَمْسًا قَبْلَ الْقِرَاءَةِ

Maksudnya: "Nabi SAW bertakbir ketika solat dua hari raya, pada rakaat yang pertama sebanyak 7 kali sebelum membaca fatihah dan pada rakaat yang akhir sebanyak 5 kali sebelum membaca fatihah".

(Riwayat al-Tirmizi (536)

K H U T B A H HARI RAYA

Selepas selesai solat hari raya, sunat melakukan dua khutbah. Ia berlainan daripada khutbah Jumaat. Cara ini adalah mengikut perbuatan Nabi SAW.

Hal ini berdasarkan hadith daripada Ibn Umar RA berkata:

أَنَّ النَّبِيَّ (صَلَّى اللَّهُ عَلَيْهِ وَسَلَّمَ) وَأَبَا بَكْرٍ وَعُمَرَ كَانُوا يُصَلُّونَ الْعِيدَيْنِ
قَبْلَ الْخُطْبَةِ

Maksudnya: "Nabi SAW, Abu Bakar dan Umar melakukan solat hari raya sebelum berkhutbah".

(Riwayatal-Bukhari : (920) dan Muslim : (888)

Hadith seterusnya, daripada Ibn Abbas RA berkata:

خَرَجْتُ مَعَ النَّبِيِّ (صَلَّى اللَّهُ عَلَيْهِ وَسَلَّمَ) يَوْمَ فِطْرٍ وَأَضْحِى، فَصَلَّى اللَّهُ عَلَيْهِ وَسَلَّمَ
خَطَبَ

Maksudnya: "Aku keluar bersama-sama Nabi SAW pada hari raya Aidilfitri dan Aidiladha lalu Baginda bersolat, kemudian Baginda berkhutbah".

(Riwayat al-Bukhari : (932)

Semua rukun dan sunat khutbah Jumaat adalah sama digunakan pada khutbah hari raya. Hal ini berdasarkan hadith, daripada Ubaidillah bin Abdullah bin `Utbah bin Mas'ud RA berkata:

السُّنَّةُ أَنْ يَخْطُبَ الْإِمَامُ، فِي الْعَيْدَيْنِ خُطْبَتَيْنِ يُفْصِلُ بَيْنَهُمَا
بِجُلُوْسٍ

Maksudnya: "Menurut sunnah, imam berkhutbah pada kedua-dua hari raya tersebut sebanyak dua kali diselangi dengan duduk".

(Riwayat Imam al-Syafie Rahimahullah)

Khutbah yang pertama sunat dimulakan dengan takbir sebanyak sembilan kali dan khutbah yang kedua dengan takbir sebanyak tujuh kali. Hal ini berdasarkan hadith, daripada Ubaidillah bin Abdullah bin `Utbah bin Mas'ud RA berkata:

السُّنَّةُ أَنْ تُفْتَحَ الْخُطْبَةُ بِسَنْعٍ تَكْبِيرَاتٍ تَرْتِي، وَالثَّانِيَةُ بِسَنْعٍ
تَكْبِيرَاتٍ تَرْتِي

Maksudnya: "Menurut sunnah, khutbah dimulakan dengan takbir sebanyak sembilan kali berturut-turut dan khutbah yang kedua dimulakan dengan takbir sebanyak tujuh kali berturut-turut".

(Riwayat al-Baihaqi)

TEMPAT SOLAT HARI RAYA

Solat hari raya boleh didirikan sama ada di masjid atau di kawasan lapang. Walau bagaimanapun, yang afdhal antara kedua-duanya ialah tempat yang dapat menampung lebih ramai jemaah. Jika kedua-dua tempat tersebut sama luasnya, maka bersolat di masjid afdhal daripada bersolat di kawasan lapang. Ini kerana masjid lebih mulia daripada tempat yang lain dan para jemaah yang bersolat di masjid akan mendapat pahala beribadat di samping pahala berada di dalamnya.

TAKBIR PADA HARI RAYA

Sunat bertakbir bagi umat Islam pada waktu terbenamnya matahari pada malam Aidilfitri hingga imam mula bersolat hari raya. Ia dilafazkan dengan suara yang nyaring sama ada di rumah, di jalan, di masjid dan di tempat-tempat awam. Hal ini berdasarkan firman Allah SWT:

وَلَتُكَبِّرُوا اللَّهَ عَلَىٰ مَا هَدَنَاكُمْ وَلَعَلَّكُمْ تَشْكُرُونَ

Maksudnya: *Dan juga supaya kamu cukupkan bilangan puasa (sebulan Ramadhan), dan supaya kamu membesar kan Allah kerana mendapat petunjuk-Nya, dan supaya kamu bersyukur.*

(Surah al-Baqarah: (185)

Semua hal yang tersebut berdasarkan perbuatan Rasulullah SAW dan amalan yang diteruskan oleh para sahabatnya sebagaimana hadith-hadith yang berikut: Daripada Ali dan Ammar RA :

أَنَّ النَّبِيَّ (صَلَّى اللَّهُ عَلَيْهِ وَسَلَّمَ) كَانَ يُكَبِّرُ يَوْمَ عَرَفَةَ صَلَاةَ الْعَدَاءِ،
وَيَقْطَعُهَا صَلَاةً الْعَصْرِ آخِرَ أَيَّامِ التَّشْرِيقِ

Maksudnya: “Nabi SAW bertakbir pada hari Arafah selepas solat Subuh dan memberhentikannya selepas solat Asar hari Tasyriq yang akhir”.

(Riwayat al-Hakim (1/299)

Al-Hakim mengatakan bahawa sanad hadith ini sahih dan dia tidak mendapati sebarang cacat cela yang dikaitkan dengan semua periyatanya.

LAFAZ TAKBIR YANG AFDHAL

Lafaz takbir yang afdhal ialah:

الله أَكْبَرُ اللَّهُ أَكْبَرُ، لَا إِلَهَ إِلَّا اللَّهُ، اللَّهُ أَكْبَرُ، اللَّهُ أَكْبَرُ

وَلِلَّهِ الْحَمْدُ ۝

الله أَكْبَرُ كَبِيرًا ، وَالْحَمْدُ لِلَّهِ كَثِيرًا ، وَسُبْحَانَ اللَّهِ بُكْرَةً وَأَصِيلًا ،

لَا إِلَهَ إِلَّا اللَّهُ وَلَا تَعْبُدُ إِلَّا إِيَّاهُ ،

مُخْلِصِينَ لَهُ الدِّينَ وَلَوْ كِرَهَ الْكَافِرُونَ ، لَا إِلَهَ إِلَّا اللَّهُ وَحْدَهُ ،

صَدَقَ وَعْدَهُ ، وَنَصَرَ عَبْدَهُ ،

وَأَعْزَزَ جُنْدَهُ وَهَزَمَ الْأَحْزَابَ وَحْدَهُ ، لَا إِلَهَ إِلَّا اللَّهُ وَاللَّهُ أَكْبَرُ ،

الله أَكْبَرُ وَلِلَّهِ الْحَمْدُ

ADAB-ADAB BERHARI RAYA

Antara adab hari raya ialah:

- ❖ Mandi, memakai bau-bauan dan memakai pakaian yang baru. Sunat mandi pada hari raya Aidilfitri dan Aidiladha bagi sesiapa sahaja yang hendak bersolat hari raya ataupun tidak, kerana hari raya ialah hari untuk berhias, maka sunatlah mandi pada hari raya tersebut.

Ini berdasarkan riwayat:

أَنَّ عَبْدَ اللَّهِ بْنَ عُمَرَ كَانَ يَعْتَسِلُ يَوْمَ الْفِطْرِ قَبْلَ أَنْ يَعْدُو
إِلَى الْمُصَلَّى

Maksudnya: "Abdullah bin Umar RA mandi pada hari raya Aidilfitri sebelum pergi ke tempat solat."

(Riwayat Malik dalam *al-Muwatta'* (1/177)

Hal ini berdasarkan hadith *dhaif*, daripada Ibn Abbas RA, katanya:

كَانَ رَسُولُ اللَّهِ (ﷺ) يَعْتَسِلُ يَوْمَ الْفِطْرِ وَيَوْمَ الْأَضْحَى

Maksudnya: "Rasulullah SAW mandi pada hari raya Aidilfitri dan hari raya Aidiladha

(Riwayat Ibn Majah : (1315)

Walau bagaimanapun, hadith ini diperkuuhkan lagi dengan perbuatan para sahabat dan dengan qias di atas. Waktu mandi sunat dua hari raya bermula pada tengah malam hari raya tersebut.

- ❖ Sunat bersegera ke masjid pada pagi hari raya.
- ❖ Sunat makan sedikit makanan sebelum pergi bersolat Aidilfitri manakala Aidil Adha pula tidak sunat makan dan minum sehingga selesai bersolat.
- ❖ Sunat pergi ke masjid dengan berjalan kaki dan balik semula melalui jalan yang lain.

Hal ini berdasarkan hadith, daripada Jabir RA berkata:

كَانَ النَّبِيُّ (صَلَّى اللَّهُ عَلَيْهِ وَسَلَّمَ) إِذَا كَانَ يَوْمُ عِيدٍ خَالَفَ الطَّرِيقَ

Maksudnya: "Nabi SAW melalui jalan yang berlainan ketika pergi dan balik pada hari raya".

(Riwayat al-Bukhari (943)

- ❖ Selepas matahari terbit, makruh bagi imam bersolat sunat sebelum solat hari raya, manakala tidak makruh bagi orang lain melakukannya.

Hal ini berdasarkan hadith, daripada Ibn Abbas RA:

أَنَّ النَّبِيَّ (صَلَّى اللَّهُ عَلَيْهِ وَسَلَّمَ) حَرَجَ يَوْمَ الْفِطْرِ، فَصَلَّى رَكْعَتَيْنِ مَمْ يُصَلِّ
قَبْلَهُمَا وَلَا بَعْدَهُمَا

Maksudnya: "Nabi SAW keluar pada hari Aidilfitri lalu Baginda bersolat hari raya sebanyak dua rakaat dan tidak melakukan solat yang lain sama ada sebelum atau selepasnya".

(Riwayat al-Bukhari (945)

SENARAI SEMAK AIDILFITRI


- Zakat fitrah bagi diri sendiri dan tanggungan
- Bermunajat dan berdoa pada malam hari raya.(Waktu Mustajab)
- Mengucapkan bertakbir, bertahmid dan bertahlil kepada Allah
- Menghiaskan diri dan tempat agar kelihatan bersih dan indah
- Mandi sunat Aidilfitri pada pagi hari raya dengan niat : *"Sahaja Aku Mandi Sunat Aidilfitri Kerana Allah Taala"*
- Mengucapkan selamat dan mendoakan antara satu sama lain ; Tiada masalah untuk menggunakan apa juar kalimah, asalkan ianya mempunyai maksud yang sama. Contohnya, "Semoga Allah menerima amalan (amalan dan ibadat di Ramadhan) kami dan kamu".
- Memakai pakaian yang baru/bersih sebagai tanda kesyukuran ke hadrat Allah Taala Demikian juga, tidak dibenarkan untuk menghina pakaian orang lain yang kurang indah dan mahal
- Mengelakkan pembaziran ketika menyambut hari raya dengan persiapan yang sederhana.
- Memakai wangi-wangian pada pagi hari raya.
- Menjamah makanan sebelum menuju ke surau atau masjid. Rasulullah SAW bersabda yang bermaksud : *"Daripada Buraidah, berkata ia, adalah Rasulullah SAW tidak keluar rumah pada hari raya fitrah kecuali selepas ia makan dan ia tidak makan pada hari raya Aidiladha kecuali selepas kembali ke rumah"*
- Memohon keampunan dan bermaafan-maafan dengan ibubapa, suami isteri, anak-anak, saudara mara, jiran tetangga dan sebagainya.
- Disunatkan pergi dan balik ke masjid menggunakan jalan yang berlainan dan lebih afdal berjalan kaki jika ia tidak terlalu jauh.

- Menunaikan solat sunat hari raya dan mendengar khutbah dengan penuh penghayatan.
- Ziarah menziarahi kaum keluarga, sahabat handai, jiran tetangga dan sebagainya. Rasulullah SAW bersabda yang bermaksud : *"Hubungkanlah silaturahim ke atas mereka yang telah memutuskan hubungan dengan kamu dan berbuat baiklah ke atas sesiapa yang berbuat kejahanatan terhadap kamu"*
- Bersedekah kepada mereka yang memerlukan. Rasulullah SAW bersabda yang bermaksud: *"Sesungguhnya sedekah seorang Muslim itu menyebabkan dipanjangkan umur, mengelak mati dalam kehinaan, menghilangkan perasaan takabur dan bangga diri (Riwayat Tabrani)*
- Mengelak sambutan hari raya daripada perkara yang ditegah oleh syarak seperti pesta hiburan melampau, pergaulan bebas tanpa batas seperti menonton wayang, menganggu ketenteraman awam dengan merempit dan tidak menutup aurat lain-lain lagi.

PERKARA YANG DITEGAH DI HARI RAYA

- i. **Sentuhan**: Berjabat tangan di antara lelaki dan wanita secara meluas ketika berziarah rumah jiran dan rakan. Walaupun terdapat perbezaan pendapat para ulama dalam bab ini, ia lebih baik dijauhi terutama apabila melibatkan pemuda dan pemudi.
- ii. **Aurat & Ipar**: Ipar duai yang tidak menjaga aurat di antara satu sama lain ketika berada di dalam rumah. Seperti adik ipar perempuan tidak menutup aurat di rumah sedangkan abang iparnya berada di rumah. Termasuk juga, tidur secara terbuka di ruang tamu tanpa menutup aurat, sehingga membolehkan abang ipar atau adik ipar lelaki melihat aurat yang terdedah.
- iii. **Wangian Wanita**: Kaum wanita memakai wangian dan solekan ala artis di musim perayaan lalu keluar dari rumah mendedahkan diri mereka kepada lelaki bukan mahram.
- iv. **Pakaian Wanita**: Pakaian yang mendedahkan susuk tubuh dengan sempit dan nipisnya lalu bertandang ke khalayak ramai.
- v. **Kubur**: Berkumpul beramai-ramai di kubur hingga duduk di atas kubur orang lain dengan alasan untuk membaca Yasin yang agak panjang dan meletihkan jika berdiri. Larangan ini disebut jelas di dalam mazhab Syafie sebagai dihurai oleh Imam Khatib As-Syarbini, malah bersandar kepadanya juga dilarang (Mughni Al-Muhtaj, 1/354 ; Minhaj at-Tolibin)
- vi. **Meninggalkan solat**: kerana terlalu sibuk beraya di sana sini.
- vii. **Dosa Bertempoh**: Kembali melakukan dosa yang ditinggalkan di bulan Ramadhan. Malah memang sebahagiannya diniatkan untuk disambung selepas Ramadhan. Sebagai contoh, ada yang menangguhkan pergaduhan di Ramadhan, maka syawal bolehlah bergaduh kembali. Syawal dijadikan tempat lambakan maksiat berdating, bersyahwat melalui telefon dan 'chat', berjalan jauh berdua-duaan dengan teman wanita dan lain-lain. Hancurlah seluruh kebaikan yang baru hendak sebatи dengan hati, sudah dibuangnya jauh-jauh.

Catatan



Dikeluarkan oleh:

JABATAN MUFTI NEGERI KEDAH DARUL AMAN
Aras 3, Bangunan Mahkamah Syariah & Jabatan Mufti,
Kompleks Pentadbiran Kerajaan Persekutuan,
Bandar Mu'adzam Shah, Anak Bukit 06550 Alor Setar, Kedah Darul Aman.
Tel : 04-731 2800 Faks: 04-732 0807 email:mufti@kedah.gov.my